



Broj/Број: 03-/4-50-1-10-18-19/8
Sarajevo/Сарајево: 24. 12. 2008. godine

Z A P I S N I K

18. sjednice Zajedničke komisije za evropske integracije Parlamentarne skupštine BiH, održane 23. 12. 2008.

Sjednica je počela u 11 sati.

Predsjedavajući Halid Genjac sazvao je 18. sjednicu Zajedničke komisije za evropske integracije Parlamentarne skupštine BiH.

Sjednici su prisustvovali članovi Zajedničke komisije: Halid Genjac, Drago Ljubičić, Ivo Miro Jović, Šemsudin Mehmedović, Rudo Vidović, Zoran Koprivica, Azra Hadžiahmetović, Milica Marković i Branko Dokić, te Vlatka Dangubić, sekretar Komisije, i Vladana Lučić, stručni saradnik u Zajedničkoj komisiji. Sjednici su prisustvovali i predstavnici Misije OSCE-a u BiH, Program parlamentarne podrške. Alma Čolo, Selim Bešlagić i Hilmo Neimarlija opravdali su odsustvo.

Sjednicom je predsjedavao predsjedavajući Zajedničke komisije Halid Genjac.

DNEVNI RED

1. Usvajanje Zapisnika 17. sjednice Komisije;
2. TAIEX kao instrument pomoći u procesu usklađivanja zakonodavstva;
- izlaganje – Amela Alihodžić, pomoćnik direktora DEI-a;
3. Informacija o korištenju IPA fondova;
- izlaganje Zara Halilović, vršilac dužnosti direktora za koordinaciju pomoći EU u DEI-u;
4. Informacija o TWINNING projektima;
- izlaganje –Zara Halilović, DEI;
5. Tekuća pitanja.

Ad. 1. Usvajanje Zapisnika 17. sjednice Komisije

Nakon što je jednoglasno usvojen dnevni red, prisutni članovi jednoglasno su usvojili Zapisnik 17. sjednice Komisije, koji ranije dostavljen.

Ad. 2. TAIEX kao instrument pomoći u procesu usklađivanja zakonodavstva:

Uvodno izlaganje: Amela Alihodžić, pomoćnik direktora Direkcije za evropske integracije

Amela Alihodžić, pomoćnik direktora Direkcija za evropske integracije, na početku svog izlaganja zahvalila je Zajedničkoj komisiji na pozivu da članovima Komisije predstavi TAIEX kao instrument pomoći u procesu usklađivanja zakonodavstva BiH s pravnom tečevinom EU (*acquis communautaire*). TAIEX je jedinica u okviru Generalnog direktorata za proširenje Evropske komisije koja pruža tehničku pomoć u oblasti usklađenosti, transpoziciji i provođenju *acquisa*. Ona je naglasila da je usklađivanje zakonodavstva prioritet, odnosno ugovorna obaveza koja je stupila na snagu 16. juna ove godine, a koja je sadržana u članu 70. Sporazuma o stabilizaciji i pridruživanju. Ugovorene su dvije faze – I. faza je transpozicija *acquisa* kojim se regulira unutrašnje tržište/trgovina, a II. faza je fokusiranje na preostali dio *acquisa*. Modaliteti pomoći TAIEX podrazumijevaju dolazak stručnjaka za pojedine oblasti *acquisa* - transpozicija *acquisa* u domaće zakonodavstvo, dvodnevne/jednodnevne seminare i radionice u državama članicama i državama regiona, te studijske posjete državama članicama. Amela Alihodžić upoznala je članove Komisije da je Direkcija za evropske integracije od 2004. godine generalni koordinator za TAIEX projekte u BiH, te da pravo učešća u ovim programima imaju svi državni službenici iz institucija na svim nivoima vlasti u BiH. Ona je također predstavila pokazatelje o učešću državnih službenika iz BiH u TAIEX programima za 2007. i 2008. godinu, koji će, nakon što uspješno prođu TAIEX obuku, biti raspoređeni u radne grupe za harmonizaciju *acquisa*. Na kraju izlaganja ona je istakla neophodnost proaktivnije uloge BiH u TAIEX programima, koja će osigurati i veća sredstva iz evropskih fondova, namijenjena zemljama potencijalnim kandidatima.

Učesnici u diskusiji ukazali su na problem predvođenja *acquisa*, te predložili da se upute zvanični zahtjevi susjednim zemljama, prije svega Hrvatskoj i Srbiji, da se uspostavi zvanična saradnja u ovoj oblasti kako bi se *acquis* prevodio racionalnije i kako bi BiH bila u situaciji da koristi prevode određenih poglavlja Hrvatske i Srbije.

Ad. 2. Informacija o korištenju IPA fondova:

Uvodno izlaganje: Zara Halilović, DEI

Zara Halilović rekla je da su osnovni ciljevi programa IPA pomoć državama kandidatima i državama potencijalnim kandidatima za usklađivanje nacionalnog zakonodavstva i provođenje pravne tečevine EU i priprema za korištenje kohezionih fondova.

Aplikacije za korištenje fondova programa IPA predaju se Delegaciji Evropske komisije u zemlji, a putem uspostavljene nacionalne strukture.

IPA se sastoji od pet komponenti: 1) pomoć u tranziciji i izgradnji institucija 2) prekogranična saradnja 3) regionalni razvoj 4) razvoj ljudskih potencijala i 5) ruralni razvoj.

Ona je zatim govorila o prve dvije komponente ovog programa koje su na raspolaganju Bosni i Hercegovini, kao zemlji potencijalnom kandidatu.

Komponenta 1) Pomoć u tranziciji i izgradnji institucija obuhvata sve aktivnosti koje su povezane s pravnom tečevinom EU (*aquis communautaire*), te izgradnjom administrativnih kapaciteta. Projektni prijedlozi u okviru ove komponente pripremaju se na osnovu prioriteta iz Višegodišnjeg indikativnog planskog dokumenta, a njihova realizacija provodi se na osnovu utvrđenih procedura Evropske komisije. Korisnici ove komponente su organi državne uprave, javna preduzeća, u manjem obimu nevladine organizacije, te ostale neprofitne organizacije i poslovni subjekti.

Komponenta 2) Prekogranična saradnja podržava sve aktivnosti koje su u vezi s regionalnom i prekograničnom saradnjom sa zemljama članicama, te zemljama korisnicima programa IPA. Ove aktivnosti zasnivaju se na višegodišnjim programima prekogranične saradnje i realiziraju se prvenstveno kroz pozive za podnošenje projektnih prijedloga.

Potencijalni korisnici ove komponente, zavisno od prioriteta i mjera datog programa, mogu biti jedinice regionalne i lokalne uprave, nevladine organizacije, istraživačke i razvojne institucije, privredne komore itd. Za Bosnu i Hercegovinu je u periodu od 2007. do 2010. godine u okviru programa IPA (komponente 1) i 2)) osiguran iznos od ukupno 332 miliona eura.

Za ukupnu koordinaciju i upravljanje programima IPA u BiH zadužena je Direkcija za evropske integracije, odnosno Ured nacionalnog koordinatora za IPA. Sredstva iz IPA-e raspoređuju se isključivo u skladu s Višegodišnjim indikativnim planskim dokumentom. Višegodišnji indikativni planski dokument za 2008.-2010. godinu za BiH usvojen je u septembru 2008. godine. Evropska unija dodijelila je BiH ukupno 74,8 miliona eura u okviru programa IPA. Glavne oblasti kojima je pomoć namijenjena su: jačanje vladavine prava i struktura javne uprave, ekonomski i socijalni razvoj, te demokratska stabilizacija, uključujući i podršku civilnom društvu.

.

U raspravi, koja je uslijedila nakon izlaganja direktora za koordinaciju pomoći EU, učestvovali su: Halid Genjac, Azra Hadžiahmetović, Šemsudin Mehmedović i Zoran Koprivica.

Halid Genjac je, između ostalog, rekao da je veoma bitno da se ovlada procedurama korištenja fondova IPA-e, s obzirom da je jedna od uloga Komisije i nadziranje korištenja ovih fondova. Njega je zanimalo kako su u Briselu ocijenjeni projekti koje je Bosna i Hercegovina ranije kandidirala, te koliko je tačno sredstava direktno programirano za Bosnu i Hercegovinu i zašto je došlo do zastoja realizacije ranije odobrenih projekata IPA fondova.

Zoran Koprivica predložio je da se pokrene Inicijativa za ekološko-reciklažni projekat za sve veće gradove u BiH, po uzoru na iskustva Rumunije i Bugarske u korištenju IPA fondova. Sugerirao je da nosilac projekta bude Komisija, DEI i nadležna ministarstva, u saradnji s entitetima, u čijoj nadležnosti je ekologija. Cilj projekta bi bio sakupljanje otpadnih sirovina, proizvodnja recikliranih proizvoda, otvaranje novih radnih mjesta, zaštita okoliša kao i novi izvori energije.

Ad. 3. Informacija o TWINNING projektima:

Uvodno izlaganje: Zara Halilović, DEI

Zara Halilović informirala je članove Komisije da se TWINNING projekti realiziraju kroz komponentu I. i finansiraju kroz usluge. U pitanju je tehnička pomoć TA koju osigurava zemlja partner u određenom projektu za koji se aplicira ili institucija te zemlje. Za ovakve projekte mora postojati politička ili diplomatska pozadina, odnosno zbližavanje s određenom zemljom ili institucijom. Za projekat (pripremu projektne dokumentacije) odgovorna su dva tim lidera (iz naše zemlje i zemlje koja pruža pomoć). Institucija koja želi da bude partner u TWINNING projektu mora osigurati prostor i opremu za eksperte iz inozemstva, koji dolaze povremeno ili su stalno prisutni u toku realizacije programa. U Bosni i Hercegovini su već realizirani određeni TWINNING projekti, u kojima su naše institucije ostvarile partnerske odnose sa zemljama članicama, prije svega s Njemačkom, Francuskom i Holandijom.

Ad. 4. Tekuća pitanja:

- sastanak s ministrom vanjskih poslova Luksemburga Jeanom Asselbornom

Članovi Komisije obaviješteni su da je ministar vanjskih poslova Luksemburga Jean Asselborn, koji će boraviti u zvaničnoj posjeti BiH 12. i 13. 1. 2009. , zatražio sastanak s članovima Komisije za evropske integracije. Sastanak je zakazan za 13. 1. 2009., u 12,45 sati.

- 11. interparlamentarni sastanak s Delegacijom Evropskog parlamenta za odnose sa zemljama Jugoistočne Evrope

Predsjedavajući Komisije predstavio je članovima Komisije nacrt dnevnog reda 11. interparlamentarnog sastanka, koji je dostavljen iz Evropskog parlamenta: 1.Reforma ustava: perspektive za nastavak pregovora; 2. Funkcioniranje pravosuđa i policije i borba protiv korupcije i organiziranog kriminala u BiH; 3. Procesuiranje ratnih zločina u domaćem pravosuđu; 4. Zdravstvena i socijalna zaštita s posebnim osvrtom na zaštitu žena, djece i starijih lica; 5. Ekonomska situacija; 6. Vizne olakšice, Programi EU i „People to people“(Narod narodu) inicijative: ocjena učešća BiH.

Dogovoreno je da će na narednoj sjednici biti utvrđen sastav delegacije koja će učestvovati na 11. interparlamentarnom sastanku.

Sjednica je završena u 13,10 sati.

Predsjedavajući
Zajedničke komisije
Halid Genjac